

Ioseph, se iugeoient mesme criminels, d'auoir esté l'obiet d'une poursuite infame.

Il faut, disoit vn d'eux la larme à l'œil, que depuis peu le diable ayt apperceu que ma foy se soit affoiblie, puis qu'il cache si peu les desseins qu'il a dessus moy: nos ennemis n'attaquent pas ouuertement vn Bourg, qu'ils fçauent estre de bonne deffense, & ayant raconté à celuy de nos Peres auquel il auoit son recours, les violences qu'il venoit de faire pour se retirer des mains de quelques impudentes: Il y a cinq ans que ie fus pris captif des Iroquois, adiousta-il: mais alors i'eu moins de frayeur, quand les ennemis se ietterent sur moy, que ie n'en ay senti à l'abord de ces malheureuses.

Voicy à ce propos vne conuerfion qui me semble assez remarquable. Vne de ces filles débauchées ayant veu que toutes [50] ses poursuites n'auoient rien pû sur l'esprit d'un ieune Chrestien, rentra dedans foy mesme, & iugea qu'il falloit que nostre foy fust quelque chose d'excellent, puis que mesme en vn âge qui n'estime que les plaisirs, elle en donnoit de l'auesion & de l'horreur, à ceux qui l'auoient embrassée. Elle s'enquista d'une ieune Chrestienne, & luy demanda si en effet elle croyoit qu'il y eust vn Enfer; & comment elle pouuoit estre asseurée que les François, qui les venoient instruire, ne leur disoient point des menfonges. Je le croy fermement, respondit la Chrestienne; mais quand bien ce seroit vne chose douteuse, la seule pensée que peut-estre il y a vn Enfer pour ceux qui demeurent infideles, vous deuroit faire redouter vn malheur si terrible: autrement nous auons tort allant dedans nos champs tout le long de l'Esté, de craindre les embusches cachées